

REGIONAL NEWS

HEADLINES:-

1. State chhunga Ration card var nei te buhfai leina man zat pun a ni anga, retailer te lawmman tihpun a ni bawk ang.
2. Assembly Speaker Pu Lalbiakzama'n dan thar Criminal Law chu mipuite hamthatna atana siam anih ang ngeiin mipuite ngaihven tur leh hmang tangkai turin a chah.
3. Prime Minister Narendra Modia chuan central leh state sawrkar ten Manipurah remna leh muanna a awm theihna turin theihtawp a chhuah reng a ti.
4. Uttar Pradesh-a Hathras district-a sakhaw thila inhmuhkhawmnaa inpawngneknaa thi zat chu mi 121 an tling tawh.

<><><>

SUPPLY MINISTER

Food, Civil Supplies & Consumer Affairs Dept Minister Pu B. Lalchhanzova chuan state chhunga Ration card var nei te buhfai leina subsidy sorkarin a pek thin chu tihhniam a ni dawn a , retailer te lawmman tihpun a ni dawn tih sawiin, he ruahmanna thar hi kumin October thla atanga hman tan tum a ni a ti.

Vawiin khan Aizawl Press Club-ah press conference neiin Supply Minister chuan, Buhfai kg khata subsidy cheng 25 an pek thin chu cheng 10 ah ti hniamin card var hmangtuten cheng 15 a an khul thin chu cheng 30 in an khul tawh dawn a ti a, Retailer lawmman Kg khata duli ni thin pawh cheng 1 leh duliah tih san ani tawh ang a, He subsidy ennawn hian NFSA dawngtu Card Eng leh Card Pawl hmang te a nghawng ve dawnlo ani.

Pu Lalchhanzova chuan VIP buhfai quota tihtawp a nih thu a sawi bawk a, Chief Minister, Minister, MLA leh group A officer-te tana buhfai quota lei thin chu tihtawp a, khawsak harsa lote pawh ngen chhoh zel ni se an ti tih a sawi a, an hmalakna avang hian sorkarin thlatin cheng vbch 5 nuai 25 sing 9 & 3,072/- hum in kum khatah chuan cheng vbch 63 nuai 11 sing 1 & 6,864/- a hum thei dawn a ni a ti a, he hmalakna avang hian state buhfai mamawh hi cheng vbc 80 vela in enkawl theih a beiseiawm a ti bawk.

Supply Minister chuan, tun dinhmunah card var nei zingah mi harsa tak tak an awm tih an hriat thu a sawi a, hemi chungchang chingfel tur hian hma an la a, NFSA dawng thei zingah dinhmun tha te zawnchhuaha, Card vara awm tirin, Card var hmang mek miharsa te NFSA a thun luh beihpui thlak ani ang, a ti a. Food security a awm tur thlan dan ah ramri kham mumal a har a, khawpuia cheng kum khata an chhungkaw sum lakluh cheng nuai 4 tling zo lo te chu Food Security ah hian rin luh ni se, Thingtlanga cheng kumkhata an sum lakluh cheng nuai 2 sing 5 tling zo lo te pawh Food Security ah rin lut tura hmalak chhoh mek a ni a ti.

Ration card hi economic status tehna pawimawh tak ani chho tih sawiin, Health Care, Ruangphurh, Golden Card leh thildang ah te NFSA a awm chu dinhmun harsa te tan thil hlu tak ani a, Buhfai bikah NFSA scheme hmang nghal vek theilo mahse NFSA category a thun luh thuai hi an mamawh hle a ni, a ti.

Supply Minister Pu B. Lalchhanzova'n fur kawng chhia avanga khaw tlawhpawh harsa hmun kilkhawr ami ten an nghei loh nan October thleng daih buhfai dah khawl a ni a ti.

He thu hi Akashvani corr zawhna chhanga sawiin Food Civil Supplies and Consumer Affairs Minister chuan fur kawng chhia avanga khaw tlawh pawh harsa ten buhfai an nghei lohna turin theihtawp chhuah a ni a, Mizoram hmun hrang hranga khaw tlawh pawh harsa ah an dah kim tih a sawi bawk.

Pu B. Lalchhanzova chuan buhfai stock sa engemawzat awm mahse FCI leh Open Tender atangin normal quota lei khawl ve reng ani a ti a, harsatna taw klo turah an in ngai tih a sawi a ni.

<><><>

CM

Chief Minister Pu Lalduhoma hovin Mizoram State Policy Coordination Committee te chu vawiin khan Chief Ministers Conference Hall ah an thukhawm a, thlai thar lei tur pahnihte Collection Centre tur an ruat fel.

Hmunphiah hi Policy in a lo sawi tawh angin collection centre-ah Grade A cheng 100 leh Grade B cheng 80 tea lei tur a ni a. Collection Centre hi hmun thum- Saipum, Vairengte leh Bairabiah a awm ang a. Hmuhphiah dahkhawmna tur Warehouse hi hmun hrang hrangah sak tum mek a ni bawk.

Sawhthing hi Collection Centre-ah bawk cheng 50 aia tlem lova leisak tur a ni a. Collection Centre hi Bairabi leh Sairangah te an awm ang. Sawhthing hi open market-a kalpui tur a ni a, Open market buyer an awm loh palh theih avangin a in venna atan he ruahmanna hi siam a ni. Collection centre te hi chak taka umzui ni se an ti.

Thlai thar palite lei chungchang Data mumal tak vawn a tul avangin Data Entry Centre dahna tur pawh an rel fel nghal a ni.

<><><>

VARTALAP - NEW CRIMINAL LAWS

Mizoram Assembly Speaker Pu Lalbiakzama'n dan thar Criminal Law chu mipuite hamthatna atana siam anih ang ngeiin mipuite ngaihven tur leh hmang țangkai turin a chah.

He thu hi vawiina Aijal Club-a Press Information Bureau buatsaih Dan thar chungchang zirhona an buatsaih a hmanpuina ah a sawi a, Speaker chuan dan thar chu mipuiten ngaihven a pawimawh rual in thuthar thehdarhtute nena țan ho a pawimawh a ti a, mi tinin mahni himna tura duan dan thar chu ngaihven țheuh turin a ngen tih a sawi.

Pu Lalbiakzama chuan dan tharin a tum ber chu hmanlai atanga dan lo awm tawh tunlai hun nena inmil lo tam tak thlak a ni a ti a, harsatna țhenkhat thuneihna in a huam chin tih chian leh dan bung leh chang hman tlak tawh loh paih a ni a ti bawk.

Mizoram IGP Pu Lalbiakthanga Khiangte pawhin thu sawiin ramchhunga hman tur hnuchhuina atana duan criminal law pathum hmang turin Mizoram Police te an inpeih fel tawh a ti a, criminal law pathum hman ve theih nan nasa taka an inbuatsaih thu a sawi a, Mizoram Police-te training pe turin NCRB atanga trainer an chah chhuah thu leh District hrang hranga Police Officer-te chu training an lo pek lawk tawh thu leh training pe thei tur mi 100 chuang an neih tawh thu a sawi a, Mizoram Police Constable chin chunglam Criminal Law duan thar chungchangah training pek vek anni tawh tih a sawi.

IGP chuan dan thar hnuaiah FIR pawh online hmanga thawn leh dawn theih a nih tawh tur thu sawiin online a case register thei tur Mizoram District 11 atangin Police 148-te zirtirna an pek tawh thu a sawi a. Dan tharah mipui humhimna tam zawk ruahman ani tih sawiin mi tin ten ngaihven a, dan hnuaiah mahni himna tur leh tihsual theih ang te hrechiang turin a chah bawk.

DG NE Zone Pu Satish Nambudiripad pawhin thusawiin tun dinhmunah dan hluia tha tawklo tam tak a thar tha zawka thlak chuan mipuite tan himna tam zawk leh rorelna tha zawk a awm theih a beisei a ti bawk.

Vawiin Program-ah hian PIB staff, AIR staff, Doordarshan staff te leh Govt Mizoram Law College zirlaite an tel a, heng bakah hian thuthar lakhawmtute leh sawm bik mi pawimawhte an tel bawk.

<><><>

LADC

Lai Autonomous District Council hnuaia Lawngtlai Chandmary Bial By-Election neih zawh taka MDC a thlantlin Pu C.Lalsawmzuala chu vawiin khan LADC Chairman Pu V.L Hmuaka'n rinawmna thu tiam tirin MDC atan a lalut.

Lakluh inkhawmah hian thusawiin CEM Pu C.Lalmuanthanga, chuan LADC ah hian kalphungthar aiin kalphung dik an mamawh zawk a ti a, kalphung dik zawh turin MNF leh INC intawm Sawrkar a kal mek a, he Sawrkar hi langtlang Sawrkar anih theih nan dik tak leh fel taka rorelna kalpui ka tum ani ati a, rinawmna thu tliamtir a lakluh tak Pu C.Lalsawmzuala chu awm mai mai tir a tum loh thu leh, Dawhkan nei a, chanvo pawimawh tak a chelh tur thu a sawi bawk.

MDC thar Pu C.Lalsawmzuala pawhin thusawiin, inthlan hma atanga mipuiten rinthu a an sawi, MNF an tlin chuan LADC Sawrkar a Congress CEM hi an paihthla leh ang tih chu beiseina beidawnthlak a ni ang a ti a, LADC Sawrkar kal mek chu ngeth taka a kal theih nan theihtawp chhuah in a veng tlat dawn a ni a ti a, Mi rinawm tlemte avangin LADC Sawrkar chu ngeth takin a kal zel dawn ani ati bawk.

Pu C.Lalsawmzuala lakluh inkhawm ah hian LADC a MDC te bakah, Pu H.Zothangliana Ex-MLA bakah LADC hnuaia thawk Officer te leh Party mi thahnem tak an tel a. Pu C.Lalsawmzuala chu LADC CEM bakah MNF leh INC atangin lawmpuina Pangpar an hlan ani.

Heti hian tun dinhmunah LADC a Elected MDC 25 awmna ah hian MNF in MDC 13 neiin, ZPM in MDC 10 an nei a, INC leh BJP in MDC 1 ve ve an nei mek bawk ani.

<><><>

PM

Prime Minister Narendra Modia chuan central leh state sawrkar ten Manipurah remna leh muanna a awm theihna turin theihtawp a chhuah reng a ti. Nimina President thusawi chungchanga lawmthu sawina motion ah he thu hi sawiin Pu Modia chuan Manipur-a tharum thawhna thleng zat chu a tlahniam zel a ti a. Union Home Minister leh Minister of State te chuan a hmunah hun rei tak an chamchilh a ti a. Mipuite nen pawh inpawh takin an inbe fo a ti a. Political party hruaitute bakah sawrkar officer ten nitin zantin theihtawp an chhuah a ti a. Manipurah hian school leh college te pawh hawn a ni leh tawh tih sawiin exam pawh an kalpui leh thei tawh a ni a ti.

Prime Minister Narendra Modia chuan exam zawhna putru chu a ngaithutak hle a, thil tisualtute chu chhuah an ni lo ang a ti He pawikhawihna chhui tur hian a tul zawng zawng tih zel a ni a ti a. Ramchhung hmun hrang hrangah NEET exam-a thil diklo lo titute hi man zel an ni tawh a ti a. Hei bakah sawrkarin hetiang pawikhawihna veng tur hian dan khauh tak a siam tawh bawk a ni a ti.

<><><>

UTTAR PRADESH STAMPEDE

Uttar Pradesh-a Hathras district-a sakhaw thila inhmukhawmnaa inpawngneknaa thi zat chu mi 121 an tling tawh. Puan tawh angina vanduaina thlenna hmun hi Mughalgarhi khuaa Ratibhanpurah a ni a. Aligarh Division Commissioner Chaitra B. sawidanin Hindu sakhaw zuituten Bhole Baba an hmannaah he vanduaina hi thlengin mi 28 in hliam an tuar bawk a. Mitthi zinga 72 hi an nihna hriat chian tawh a ni a.

Hetihlai hian Chief Minister Yogi Adityanath chuan nimin vek khan Lucknow-ah sawrkar official pawimawhte nen inhmukhawm a ko nghal a. Vawiin hian minister leh official thenkhatten vanduaina thlenna hmun hi an tlawh dawn a. Mitthi chungte hnenah hian sawrkarin ralna sum cheng nuai 2 theuh a pe dawn a, hliam tuar te pawh cheng sing 5 theuh a pek dawn a ni.

President Draupadi Murmu, Vice President Jagdeep Dhankar leh Prime Minister Narendra Modi-a te chuan vanduaina thleng chu pawl an tih thu a sawi a. Prime Minister Modia chuan mitthi chung te cheng nuai 2 leh hliam tuarte cheng sing nga theuh pek an nih tur thu a sawi a ni. Vanduaina thlen chhan chhui tur hian Investigation Team din nghal niin ADG, Agra leh Aligarh Commissioner te kaihhruaiin an chhui nghal dawn a. Darkar 24 chungin an report pe tura tih an ni.

<><><>